



## MURDDHA WAKYA

OM SWASTYASTU,

Saking kasidian ping kalih paswecan Ida Sang Hyang Widhi Wasa, cakepan puniki prasida kacarik saha kapuputang tur kasinuratang sane kaanggen titi pangancan, uger-uger utawi sepat siku-siku ngelaksanayang tata krama nyanggra Desa Adat lan Agama Hindu ring jagat Sobangan mangda prasida sidaning don mukti karahayuane sekala lan niskala utawi moksa wahya adyatmika, suka tan pawali duka.

Sane kaunggahang ring sajeroning awig awig punika wantah kawentenan desa adat Sobangan sane nganuting kecaping Tri Hita Karana, minakadinipun parindikan Parahyangan, Pawongan lan Palemahan. Ring sajeroning ngaryanang saha muputang Awig-awig puniki makeh pakeweh sane kapangguh duaning tuna kauningane sahantukan tityang dahat wimuda, janten wenten munjuk lungsur antuk tityang midartayang. Sewosan ring punika pakewehe indik basa paribasa, utamannyane anggah ungguhin basa sane patut kaanggen ring sajeroning lengkarane mangda manut sakadi tetujon awig-awig saha sang nampenin prasida resep ring sadagingipun saha psida ngamargiang,

Pinaka wasananing atur, majaeng ring para angga miwah para sajana sane sampun ledang mapaica panuntunan utawi piteket-piteket ring sajeroning ngaryanang awig-awig puniki tityang ngaturang suksmaning manah. Dumogi sangkaning ayah baktin para angga ring sajeroning muputang awig-awig puniki, krama desa adat Sibangan prasida nemu sidaning dong, labda karya ring sajeroning ngamargiang sapolah palih adat lan agama Hindu mawastu ngamolihang karahajengan sekala niskala.

Om Shantih, Shantih, Shantih Om

Desa Adat Sobangan

## MURDDHA CITTA

### OM AWIGHNAM ASTU, DESA TATA CARA, OM NAMA CIWAYA OM CRI PASUPATASTRA, OM AWIGHNAM ASTU NAMA SWAHA

Mangkana panamaskara mami kabeh ri Sang Hyang Parama Wisesa siddha amanggih dirghayusa tan kataman lara wighna pinakang hulun kabeh krama Desa Adat Sobangan. Putusing panugrahan i krama Desa Adat Sobangan, gumawe awig-awig Desa Adat, Desa tata cara, wastu kasiddan prayojana mami kabeh kateka tekeng dlaha prasama pada sumangkem mwan amanggehaken kadi linging awig-awig.

Sembah bhakti miwah pangastawan krama majeng ring paduka Bhatara – Bhatari sasuwunan sami, riantukan wantah malarapan panghyangning kalih paswecan Ida Sang Hyang Widhi Wasa asung kretawaranugraha manresti jagat jangkep rawuhin sadagingnya sami, mawinan wenten kahuripan sekala niskala ring Bhuwana Agung miwah Bhuwana Alit.

Manut dresta, Desane kamanggehang dados pasayuban Krama Desa rawuhing Kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Desane taler kamanggehang pinaka pawakan bhawa mahurip, sane kacirenin antuk wentene pakilit Tri Hita Karana sane tan dados pasahang luwire :

- Ha. Parhyangan inggih punika : Sahanan parhyangan panyiwian Desa, genah ngarcana prabhawan Ida Sang Hyang Parama Wisesa, pinaka jiwa pramanan Desane ;
- Na. Pawongan, inggih punika : Gebogan Krama rawuhing warga Desa maka sami pawakan Tri Kaya pinaka bayu pramanan Desane, mawinan Desane prasida molah maprewerti ;

Ca. Palemahan, inggih punika : Sahananing pakarangan, tegal, carik, miwah setra sakakuwuban Desa Adat, pinaka sthula sariran Desane.

Awig-awig puniki kapidaremin nemoning rahina Saniscara Pon wuku Sinta pinanggal ping 15 sasih Kasanga icaka, warsa 1935 tanggal 15 bulan Maret warsa 2014 ring Wantilah Desa Adat Sogangan.

## BANTANG AWIG-AWIG DESA ADAT SOBANGAN

MURDHA WAKYA .....	i
MURDHA CITTA.....	ii
BANTANG AWIG-AWIG DESA ADAT SOBANGAN .....	iii
SARGAH PERTAMA ARAN LAN WEWIDANGAN DESA .....	1
SARGAH KALIH PAMIKUKUH LAN PATITIS .....	1
SARGAH TIGA SUKERTA TATA PAKRAMAN .....	2
Palet 1. Indik Krama .....	2
Palet 2. Pamucuk Desa .....	8
Palet 3. Indik Kulkul .....	14
Palet 4. Indik Paruman .....	15
Palet 5. Indik Druwen Desa .....	17
Palet 6. Panyanggran Banjar .....	19
SARGAH EMPAT SUKERTA TATA AGAMA .....	20
Palet 1. Indik Dewa Yadnya .....	20
Palet 2. Indik Rsi Yadnya .....	26
Palet 3. Indik Pitra Yadnya .....	28
Palet 4. Indik Manusa Yadnya .....	34
Palet 5. Indik Bhuta Yadnya .....	35
SARGAH LIMA SUKERTA PAWONGAN .....	39
Palet 1. Indik Pawiwahan .....	30
Palet 2. Indik Nyapihan lan Walu .....	44

Palet 3. Indik Sentana .....	45
Palet 4. Indik Warisan .....	47
Palet 5. Indik Tulung Tinulung .....	50
SARGAH NEM SUKERTA TATA PALEMAHAN .....	51
Palet 1. Indik Karang .....	51
Palet 2. Indik Pepayon .....	52
Palet 3. Indik Wewalungan .....	54
Palet 4. Indik Wewangunan .....	55
Palet 5. Indik Baya .....	55
SARGAH PITU WICARA LAN PAMIDANDA .....	57
Palet 1. Indik Wicara .....	57
Palet 2. Indik Pamidanda .....	58
SARGAH KUTUS NGUWAH-NGUWUHING AWIG-AWIG .....	61
SARGAH SANGA PAMUPUT .....	64

## **SARGAH PERTAMA**

### **ARAN LAN WEWIDANGAN DESA**

#### **Pawos 1**

- (1) Desa Adat puniki mawasta ” **Desa Adat Sobangan**”
- (2) Jebar kakuwub wewidangania mawates nyatur, inggih punika:
  - Ha Ring sisi Lor : Telabah munduk Uma Dalem lan pagehan sisi kaler tegal padruen Made Wali.
  - Na Ring Sisi Kidul : Telabah Ancut Munduk Uma Narungan, Ancut Munduk Sobangan, Miwah Ancut Munduk Kebon.
  - Ca Ring Sisi Wetan : Tukad Dangkang
  - Ra Ring Sisi Kulon : Pangkung Teledu Nginyah.
- (3) Desa Adat Sobangan kepeah dados 3 (tigang) Banjar Adat, luwire:
  - Ha. Banjar Adat Selat;
  - Na. Banjar Adat Tengah;
  - Ca. Banjar Adat Tegalnarungan;

## **SARGAH KALIH**

### **PAMIKUKUH LAN PATITIS**

#### **Pawos 2**

Desa Adat Sobangan ngamanggehang pamikukuh minakadi:

- Ha. Pancasila;
- Na. Undang-Undang Dasar 1945;
- Ca. Tri Hita Karana manut sada cara Agama Hindu;

Ra. Hak Azasi Manusia utawi HAM;

Ka. Uger-Uger saking Guru Wisesa indik Desa Adat;

### **Pawos 3**

Luwir Patitis Desa Adat Sobangan:

Ha. Mikukuhing miwah ngrajegang Sang Hyang Agama Hindu;

Na. Ngutamayang/Nginggilang tata prawertine magama;

Ca. Ngrajegang kasukertan desa saha pawongannyane sakala lan niskala;

Ra. Ngrajegang kasukertan druwen desa;

## **SARGAH TIGA**

### **SUKERTA TATA PAKRAMAN**

#### **Palet 1**

### **INDIK KRAMA**

#### **Pawos 4**

- (1) Sahananing jadmajane sane jenek ring sawewengkon wewidangan desa adat Sobangan tur madruwe karang ngraga, punika sinanggeh jadmajane utawi krama desa adat Sobangan;
- (2) Tiosan ring punika sinanggeh tamiu;
- (3) Krama utawi tamiu sane mautesaha ring wewidangan Desa Adat Sobangan patut satinut ring tetiwak Awig – Awig Desa Adat Sobangan tur kapastikayang swadarmannyane manut pararem;
- (4) Krama desa sane sinanggeh (1) ring ajeng matilar genah saking desa adat Sobangan, riantukan krama inucap madruwe tanah/paumahan ring dura desa tur jenek, nanging netep makrama banjar lan desa adat ring Desa Adat Sobangan,

swadharmannyane pateh makadi krama desa tiosan, sakewanten diprade nangun yajnya kalaksanayang ring sajeroning banjar wedannyane, patut krama banjar nyanggra karyannyane miwah sane tiosan. Manawi wenten parindikan tios kasukserah pikamkam/paetangan saking banjar soang-soang;

#### **Pawos 5**

- (1) Sane kasinanggeh krama desa adat Sobangan inggih punika sahananing jadma sane jenek saha ngagem pakarangan, kaiket ring kahyangan tiga, punika sinanggeh krama desa adat.
- (2) Krama desa inucap manut linggihnyane wenten kalih soroh, inggih punika:  
Ha Kulawarga sane magama Hindu tur ngranjing nyungkemin utawi makrama desa, sinanggeh krama desa.  
Na Tiosan ring punika sinanggeh tamiu,
- (3) Krama saking dura desa sane jenek mapumahan ring desa adat Sobangan kaetangang manut pararem.

#### **Pawos 6**

Krama desa adat Sobangan wenten 3 (tigang) soroh:

- (1) Krama Ngarep, inggih punika krama sane ngagem karang ayahan desa tur keni ayahan desa.
- (2) Krama Pangele, inggih punika krama utawi kulawarga satioasan ring krama pangarep.

(3) Krama Balu, inggih punika krama sane katinggalin sangkaning sane istri utawi sane lanang padem utawi sangkaning nyapihan. Luir krama balu wenten 4 (petang) soroh:

- Ha. Balu Makrambian : Balu sane sampun madruwe pianak cucu;
- Na. Balu Ngemban : Balu sane madruwe pianak kantung alit;
- Ca. Balu Ngatung : Balu sane nenten madruwe pianak utawi sentana;
- Ra. Balu Nglintik : Balu sane nenten madruwe pianak, artha warisan lan sameton;

#### **Pawos 7**

(1) tata sulur ngetangang tedun makrama.

Ha Ngawitin tedun ngayah manados krama ngarep kaetangin nyabran rahina umanis Galungan utawi nemonin paruman agung desa adat Sobangan.

Na Ayahan Balu kaetangang pramangkin.

- (1) Sahananing wusan makrama kaetang pramangkin.
- (2) Kelihan desa adat miwah Banjar adat patut ngwantu nyacah jiwa, ngetangang miwah mastikayang, pakraman saha ayah-ayahan kadi ring ajeng.
- (3) Pamastikan cacah jiwa indik pakraman miwah ayah-ayahan, kapikukuhin antuk pamutus paruman banjar, gumanti prasida kamargiang.
- (4) Pamastika inucap digelis kasurat ring ilikita makrama.

## Paos 8

Wastan ayah-ayahan luire:

(1) Ayahan daha teruna inggih pumika tedun ngayah sane kapatutang ring para daha terunane sane sanistane mayusa 13 warsa.

(2) Ayah-ayahan balu luire:

Ha. Balu ngemban sane pianaknyane kantun alit-alit, keni ayahan balu.

1) Yening balu istri keni ayah-ayahan balu istri.

2) Yening balu lanang keni ayah-ayahan balu lanang.

Na Balu nglintik keni ayah-ayahan manut balunnyaane, yen lanang keni ayah lanang, yen istri keni ayah istri.

Ca Balu makrambian istri utawi lanang, sane madue oka sampun daha/teruna katedunang utawi nenten tedun ngayah kaetangang manut pararem.

(3) Ayahan krama ubuh

Sahananin krama ubuh sane sampun daha/teruna keni ayahan sakadi krama balu

## Paos 9

Tata sulur ayah-ayahan, paturunan, miwah leluputan, luire:

(1) Ayah-ayah krama kasulurang sakadi ring sor:

Ha Dados kaangganin antuk anak tiosan, sane sampun manggeh daha/teruna.

Na Dados mapuangkid, prade wenten piambeng, luire:

1) Polih dedauhan saking guru wisesa,

- 2) Malelungan, miwah mayadnya,
  - 3) Sungkan, matepetin, kalayusekaran, miwah sakancanipun.
- (2) Paturunan utawi papeson prajuru desa, sane pastika polih leluputan:
- Ha Para sulinggih miwah pamangku kahyangan desa,
- Na Sang sungkan rahat nenten prasida tambanin,
- Ca Sang ceda angga banget,
- Ra Sang alit ubuh meme bapa.

### **Paos 10**

Swadharman krama desa, luire:

- (1) Sahanan krama desa adat Sobangan patut:
- Ha Susatia ring desa adat Sobangan,
- Na Tinut ring sadaging awig-awig desa Adat Sobangan, pararem,  
miwah pasuaran guru wisesa,
- Ca Tan maren ngutsahayang mangda desa mrasidayang nyujur patitise  
ring ajeng,
- Ra Nyanggra/ngremba sapakertin desa.
- (2) Swadarmaning tamiu ring desa adat Sobangan sakadi ring sor:
- Ha Tinut ring tetiwak desa ngupadi sukertan desa,
- Na Tan wenten tungkas ring sapamargin kertin desa ring genahnyane  
jumenek.

### **Paos 11**

- (1) Sahananing krama desa wenang polih pasayuban prajuru nganutin indik:

- Ha Sangaskaraning kauripan sane mabuat, sane mastikayang iketan sulur pakulawangan,
- Na Kasucian parahyangan, pawongan, miwah palemahan soang-soang,
- Ca Sahananing wicara indik padruen soang-soang krama, kabaosang saha katiwakin pamutus.
- (2) Krama tamiu polih pasayuban indik kasukertan angga, agama, miwah padruennyane soang-soang.

### **Paos 12**

Wusan makrama manut sulur kadi ring sor:

- (1) Silih sinunggil kulawarga wusan makrama desa, prade :
- Ha Matilar saking wewidangan desa adat Sobangan, kadulurin masadok ring prajuru.
- Na Piwal ring awig-awig utawi pararem desa, saha tan tinut ring pituduh prajuru indik ngeihin parilaksana.
- Ca Katiwakin pamidanda (kasepekan) antuk desa/banjar
- (2) Sang wusan makrama nenten polih pahan padruen desa kabaos guak ngutang taluh
- (3) Desa miwah banjar wusan mapaweh pasayuban ring sang kasepekang miwah ring sane sampun pastika wusan makrama.
- (4) Prade wenten karang ayahan desa sane kaputungan, karang punika kaetangin olih desa adat manut pararem.

**Palet 2**

**PAMUCUK DESA**

**Pawos 13**

Pamucuk Desa Adat inggih punika;

- (1) Kertha Desa;
- (2) Prajuru Desa;

**KERTHA DESA**

**Pawos 14**

- (1) Kertha Desa inggih punika genah prajuru desa lan krama desa nunas dharma tetimbang yaning wenten nepasin daging awig-awig;
- (2) Swadharma Kertha Desa, wenang mapaica saluwiring indik pamargin awig-awig;  
Ha. Indik prajuru desa sane singsal ngemargiang awig-awig;  
Na. Indik krama desa sane pacang nguwah nguwuhin awig-awig desa adat;  
Ca. Indik wicara ring desa adat;
- (3) Kertha Desa patut ngicenin dharma tetimbang lan ngwantu prajuru desa lan krama desa yaning wenten pikobet indik pamargin awig-awig;

**TATA SULUR NGADEGANG KERTHA DESA**

**Pawos 15**

- (1) Kertha Desa makwehnyane manut kabuatang;
- (2) Sane dados kadegang Kertha Desa, luwirnya:  
Ha. Mawiwit saking krama wedan, utamannyane naenin dados prajuru desa utawi banjar;

- Na. Wikan ring hukum adat miwah agama lan hukum nasional;
- Ca. Ritatkala kacawis, mayusa sakirangnya 50 (seket) warsa;
- Ra, Kapilih oleh prajuru desa, lan tedung desa.
- ka. suwennyane dados Kertha Desa 5 (limang) warsa;

## **PRAJURU DESA**

### **Pawos 16**

- (1) Sane kasinanggeh prajuru Desa ring Desa Adat Sobangan inggih punika:
  - Ha. Klihan Desa/Bendesa;
  - Na. Patajuh/Pangliman;
  - Ca. Panyarikan pinaka juru surat (ilikita);
  - Ra. Patengen pinaka Pangamong druwen Desa;
  - Ka. Pasayahan pinaka widang (bhaga) Tri Hita Karana;
- (2) Prajuru Desa patut:
  - Ha. Mawiwit saking krama wedan;
  - Na. Waras miwah nenten madue ceda angga pramana;
  - Ca. Maparilaksana becik miwah nenten cacad hukum;
  - Ra. Mayusa sakirang-kirangnyane 35 warsa,

## **TATA CARA NGADEGANG PRAJURU DESA**

### **Pawos 17**

- (1) Tata cara ngadegang prajuru desa:
  - Ha. Calon kelihan desa adat mawiwit saking krama banjar adat Selat lan Tengah, patajuh saking banjar adat Tegalnarungan.

- Na. Kawentenang prawartaka pamilihan, kamanggalanin antuk prajuru desa sane lawas, kawantu olih kelihan utawi prajuru banjar sane kasudi;
- Ca. Calon saking prajuru banjar kaselehin antuk prawartaka, raris kapastikayang nenten langkung ring 5 (limang) diri calon bandesa;
- Ra. Tata cara mamilih bendesa adat wenten kalih, inggih punika:
- 1) Memilih langsung (aklamasi), inggih punika mamilih kelihan desa adat kadasarin antuk pasuara briuk siu utawi pacumpon krama.
  - 2) Pamilihan kadasarin antuk pasuara pinih akeh. Calon sane ngamolihan suara pinih akeh sane kamanggehang dados bendesa adat;
- Ka. Kelihan desa adat wenang nyudi pangabihnyane;
- (2) Prajuru desa kaadegang salami 5 (limang) warsa apisan olih paruman agung desa adat;
  - (3) Prajuru sane wawu kapilih kaupasaksiang ring pura kahyangan tiga desa;
  - (4) Sajawaning wenten parindikan tios, sang sampun puputing panumaya dados prajuru, kengin kapilih malih
  - (5) Prade kelihan desa adat mararyan sadurung panumayanipun swardarmannyane, kamargiang olih panyarikannyane ngantos kaadegang kelihan desa adat sane anyar.
  - (6) Kelihan banjar adat, kapilih olih krama Banjar manut dudonan soang-soang Banjar;

### **Pawos 18**

- (1) Ritatkala ngamargiang kasukertan desa adat, kelihan desa adat kawantu olih:  
Ha. Patajuh utawi pangliman pinaka wakil kelihan desa adat;

- Na. Panyarikan pinaka juru surat (ilikita);
  - Ca. Patengen pinaka pengamong druwen desa;
  - Ra. Kelihan-kelihan banjar sawewidangan desa adat pinaka wakil kelian desa utawi bandesa ring soang-soang banjar;
  - Ka. Pacelang sane nreptiang pamargi ritatkala wenten karya adat lan agama Hindu;
  - Da. Krama Desa Adat Sobangan;
- (2) Ritatkala ngenterang kasukertan ring niskala, kelihan desa adat patut masinggihang pamangu kahyangan tiga;

#### **Pawos 19**

- (1) Swadharmaning kelihan desa adat inggih punika:
- Ha. Ngenterang paruman - paruman desa adat;
  - Na. Ngenterang panglaksanaan sadaging awig-awig miwah pamutus-pamutus krama desa, sane kasinanggeh pararem;
  - Ca. Nudonang tata-titine migunayang artha brana druwen desa;
  - Ra. Nuntun saha ngenterang krama desa sami ngupadi kasukertan sakala lan niskala;
  - Ka. Nuntun saha nyaksiang upacara sangaskaraning kahuripan sane mabuat;
  - Da. Nuntun saha ngenterang krama desa, nginggilang Sang Hyang Agama, kasucian kahyangan, palemahan, pawongan, miwah tata-titine migunayang setra;
  - Ta. Mawosin miwah niwakang pamutus marep ring wicaran krama;
  - Sa. Maka duta desa adat, matemuang bebawos ring sapisira ugi;

- Wa. Lan sane sewosan sane wenten paiketannyane ring desa adat;
- (2) Tata titi nglaksanayang swadharma inucap ring ajeng, tan maren patut satinut ring daging awig-awig, pararem, dresta miwah pamutus paruman krama desa adat;
  - (3) Panglaksanane ring ajeng patut kasobiahang ring desa adat kapungkur wekas.
  - (4) Sumakuta utawi sumanggup natak pamutus paruman krama desa adat, nganinin swadharman sowang-sowang prajuru;

#### **Pawos 20**

Swadharmaning patajuh inggih punika ngwantu kelihan desa adat ring widang Parhyangan, Pawongan miwah Palemahan;

#### **Pawos 21**

Swadharmaning panyarikan inggih punika ngwantu kelihan desa adat ngaryanin saluir sewalaptra, nyatet inventaris desa tur nyuratang saluiring pamutus pangrawos desa ring sangkepan;

#### **Pawos 22**

Swadharmaning patengen inggih punika ngwantu kelihan desa adat ngaryanin utawi ngrincikang sakaluwir pangranjing miwah pamedal jinah desa adat lan ngupapira druwen desa;

#### **Pawos 23**

Swadharmaning kasinoman desa, ngwantu kelihan desa adat nyobyahang sualaptra utawi pamutus pangrawos desa ring banjar adat/patus/tempekan desa;

#### **Pawos 24**

Swadharmaning pacelang desa ngwantu kelihan desa adat nreptiang pamargin upakara yadnya, dharmaning agama lan dharmaning negara;

#### **Pawos 25**

- (1) Wusan dados Pamucuk Desa Adat, sangkaning:
  - Ha. Lina, seda, padem;
  - Na. Pinunas ngraga;
  - Ca. Swadharmannyane sampun puputing sengker;
  - Ra. Kawasanang utawi kanorayang olih krama desa duaning iwang pamargi, manawi nilar sasana;
- (2) Ngentosin, ngwasanang utawi nganorayang pamucuk desa adat, patut kamargiang risajeroning Paruman Agung Desa Adat;

#### **Pawos 26**

Piolih-olihan Prajuru:

- (1) Majeng ring kelihan desa adat luire:
  - Ha Upon-upon pacatu manut pararem.
  - Na Miwah sane seosan manut pararem.
- (2) Piolih-olihan prajuru panyanggra kelihan desa adat, manut kadi daging pararem desa manut dudonan.

### Palet 3

## INDIK KULKUL

### Pawos 27

- (1) Kulkul desa manggeh piranti/sarana tengerannyane mabuat kanggen wangsit ring wewidangan desa adat Sobangan.
- (2) Kulkul desa nenten wenang katepak yening nenten manut ring daging awig-awig puniki.
- (3) Kulkul ring Desa Adat Sobangan wenten 4 soroh :
  - Ha. Kulkul Desa megenah ring Pura Desa;
  - Na. Kulkul Banjar magenah ring soang-soang Banjar;
  - Ca. Kulkul Seka Teruna megenah ring Banjar;
  - Ra. Kulkul Seka-seka magenah ring prajuru soang-soang;
- (4). Tabuh tetepakan kulkul Desa pastika masiosan luwire :
  - Ha. Tengeran wali utawi upacara yadnya ring desa utawi banjar, nungting, (tung-ting, tung-ting, tung-ting, ....)
  - Na. Tengeran ngawit nglaksanayang sane sampun karahang utawi kasiarang, tabuh biasa atulud.
  - Ca. Tengeran sinalih tunggil warga desa kelayon/seda, tabuh kulkul ping 3 (tiga) dabdab ring soang-soang banjar;
  - Ra. Tengeran sinalih tunggil warga desa utawi banjar istri sane mawiwaha, tigang klentungan banban, kalanturang tung-ting.
  - Ka. Tengeran wenten sinalih tunggil warga desa ngembasang/ngamijilang rare, aklentungan.

- Da. Tengeran sinalih tunggil warga desa kamalingan, bulus atulud.
- Ta. Tengeran wenten warga desa kaplagandang, bulus kalih tulud.
- Sa. Tengeran wenten sinalih tunggil warga desa sane kaamuk, kabegal kabaak, ageni baya pati seosan, bulus tigang tulud.
- Wa. Tengeran wusan maseserep sangkaning kamalingan, dasa klentungan banban.
- (5) Kukul desa nenten wenang katepak yening nenten wenten pituduh saking kelihan desa manut dudonan, sajawaning rikala pacang nengerang indik kapancabayan.
- (6) Sapasira ugi nepak kukul nenten manut sakadi parindikan ring ajeng, (poin 5) patut digelis matur upeksa ring kelihan desa/banjar saha ngokasang indik panepake kadi ring ajeng.
- (7) Prade wenten nepak kukul anut tengeran kapancabhayan, mawastu ngamedalang krama, kasujatianne tan wenten panca bhaya, wenang sang nepak kadanda manut pararem;
- (3) Sahanan kukul banjar sawidangan jagat Sobangan patut katepak prade wenten sinalih tunggil kukul banjar sajeroning desa nyihnayang tengeran kapanca bhaya;
- (5) Kukul seka-seka tan dados matehin sikut lan tetabuhan/suaran kukul desa/banjar.

#### **Palet 4**

### **INDIK PARUMAN**

#### **Pawos 28**

- (1) Paruman ring desa adat sawewidangan desa adat Sobangan, luihipun :
- Ha Paruman krama desa adat;
- Na Paruman prajuru wiadin pamucuk desa adat.

Ca Paruman seka-seka.

- (2) Sahanan paruman sida lumaksana, prade sampun katedunin olih sang sane patut ngamiletin, maduluran suaran kukul. Sajawaning paruman prajuru/pamucuk antuk arah-arahan, saha mabusana nylempot, nganutin genah tur tan maren kamanggala antuk widiwidana cane, angarcana Ida Bhatara Bhagawan Panyarikan.
- (3) Sahanan pamutus kautsahayang pisan mangda malarapan antuk gilik saguluk. Bilih tan prasida, suarane makehan utawi suaran kalih pah tigan pamilet paruman sinanggeh pamutus.

#### **Paos 29**

- (1) Paruman desa adat kawentenang sakadi ring sor:
  - Ha. Kamargiang satunggil nem wulan apisan, satunggil umanis galungan.
  - Na. Padgata kala prade wenten sane mabuat kapikayun olih prajuru utawi kaptiang antuk apah tigan dasan krama saha maduluran bantang bebaosan sane mabuat.
  - Ca. Prasida kalaksanayang prade sampun katedunin olih kalih pah tigan akeh krama sane patut ngamiletin.
- (2) Nangken paruman kadi ring ajeng, kelihan desa adat patut nyobiahang pamargin ngenterang desa pamekas nganinin indik:
  - Ha Munjuk lungsurin ayah-ayah;
  - Na Pamargi pamelas miwah sulur arthabrana druen desa
  - Ca Pamargin usaha-usaha desa sane mabuat;

- Ra Sahananing wicara saha pamutusnyane;
- Ka Daging pasuara miwah pararem-pararem sane mabuat;
- Da Pangrencanan prajuru nganinin usaha kartin desane ka pungkuran.
- (3) Sahanan siaran ring ajeng patut katitenin saha katiwakin pamutus antuk pararem desa.
- (4) Pamutus paruman inucap sinanggeh sepat siku-siku sane patut kasungkemin saha katinutin antuk krama desa adat Sobangan.

### **Paos 30**

- (1) Paruman prajuru kasulurang kadi ring sor:
- Ha Paruman prajuru kawentenang sanistane asasih apisan utawi manut wiguna.
- Na Paruman inucap katuntun antuk kelihan desa adat.
- Ca Paruman inucap wantah kawenangang ngarincikang tata upaya ngamargiang usaha mniwah pangrancana sahaluirnia.
- Ra Sahanan pangrancana tan wenang kamargiang, sadereng kapikukuhin antuk pamutus paruman desa manut dudonan.
- Ka Paruman wantah sinanggeh ngawisesa sane wenang nyelem putihang tata pangenter desa manut dresta.

### **Palet 5**

## **INDIK DRUWEN DESA**

### **Pawos 31**

- (1) Sane kamanggehang dados druwen Desa Adat Sobangan luire :
- Ha. Kahyangan Desa:

- 1) Pura Desa/Bale Agung, Pura Puseh, Pura Dalem miwah Prajapati, lan piranti wewanguannyane;
- 2) Palawatan Ida Bhatara sakadi Arca Pratima, Barong Keet, miwah sane lianan;
- 3) Pura Melanting ring suang-suang banjar adat;
- 4) Pura Beji;

Na. Bale Kukul jangkep saha kukul desa adat

Ca. Bale Desa/wantilan; minakadi tanah lan wewangunannyane;

Ra. Bale banjar adat saha piranti wewangunannyane ring suang-suang banjar

Ka. LPD saha tanah lan wewangunannyane;

Da. Setra 2 (kalih) palebahan saha piranti wewangunannyane

Ta. Palaba Pura, marupa carik lan tanah tegalan akehipun 2,45 Ha.

Sa. Nyasa, Sasanthi;

- (2) Lelanguan minakadi tetabuhan lan ilen-ilen padruwen bebanjaran luire:

Ha. Gong ring soang-soang banjar

Na. Pasantian ring soang-soang banjar;

Ca. Lekita-lekita: pipil/sertifikat, awig-awig, pasuara utawi pararem;

- (3) Karang ayahan desa (PKD)

### **Pawos 32**

- (1) Prajuru Desa wenang ngetangang pamupon laba lan sapanunggilan druwen desa;
- (2) Pikolih lan pamuponnyane kanggen prabeya piodalan ring pura miwah wewangunan;

- (3) Nyabran pasangkepan desa, prajuru pangemong druwen desa nyobiahang pariindik munjuk lungsur padruwen desa ring krama desa;
- (4) Sakaluwir druwen desa patut wenten likitannyane;
- (5) Tan kalugra ngadol utawi ngesahang druwen desa yan tan kasungkemin antuk krama desa;

### **Palet 6**

## **PANYANGGRAN BANJAR**

### **Pawos 33**

- (1) Banjar wenang ngamanggehang tata cara nyanggra pakaryan suka duka kramane.
- (2) Pakaryan sinalih tunggil karma sane mabuat, wenang kasanggra tur kaetang antuk prajuru banjar.
- (3) Banjar patut madarsana antuk rasa pramatulung ring sang makarya. Sakemaon tan maren mitekekin kasusatyane krama ring banjar.
- (4) Bilih karyane abot, banjar wenang ngrereh pitulung ring banjar panyanding.
- (5) Pakaryan sane patut kasukserah ring banjar luire:  
Ha Ngupakara sawa utawi pitra yadnya.  
Na Nangiang upacara dewa yadnya ring pakubon soang-soang.  
Ca Upacara manusia yadnya.
- (6) Krama desa rikala karya suka-duka, patut kasanggra antuk banjar soang-soang luire:

- Ha. Prade ngwangun Pitra Yajnya utawi Manusa Yajnya, manut pinunas sang mayajnya;
- Na. Pangrombo karya gotong royong krama ngantos ping 3 (tiga), langkungan ring punika patut katurang pangu;
- Ca. Pangu rikala Pitra Yajnya manut abot yajnya, prade saking semengan ngantos wengi, katurang pangu ping 2 (kalih);
- Ra. Ritepengan nyangga pakaryan ring desa, kalaksanayang antuk banjar, katitenin olih prajuru desa;

## **SARGAH PATPAT**

### **SUKERTA TATA AGAMA**

#### **Palet 1**

### **INDIK DEWA YADNYA**

#### **Pawos 34**

Palinggih panyiwian sawidangan desa adat Sobangan, luihipun :

- (1) Kahyangan tiga.
- (2) Marajapati.
- (3) Pura Puseh Sanggulan kaempon antuk banjar Selat lan Banjar Tengah.
- (4) Pura Gunung Agung, kaempon antuk banjar Selat lan banjar Tengah
- (5) Pura Banyelawang, kaempon antuk banjar Selat lan banjar Tengah.
- (6) Pura Panataran, kaempon olih banjar Selat lan banjar Tengah.
- (7) Pura Pucak Sari, kaempon olih banjar Tegalnarungan

- (8) Pura Anyar, Pura Prabu, Pura Batur, Pura Tegal Suci, Pura Kahyangan, Pura Dalem Puri Puser Jagat, miwah pura Panti Prabhu, kaempon olih pamaksannyane soang-soang.
- (9) Rahina piodalan soang-soang kahyangan inucap ring ajeng, inggih punika:
- Ha Piodalan ring Pura Desa/Puseh nemonin Saniscara Keliwon wuku Kuningan (nemonin rainan Kuningan).
- Na Pura Dalem ring rahina Buda Umanis wuku Kulantir.
- Ca Pura Puseh Sanggulan ring rahina Werespate Umanis Pahang.
- Ra Pura Gunung Agung ring rahina Buda Keliwon wuku Sinta.
- Ka Banyelawang ring rahina Buda Wage wuku Ukir.
- Da Pura panataran ring rahina Redite Keliwon wuku Pujut.
- Ta Pura Pucak Sari ring rahina Buda Umanis wuku Medangsia.
- Sa Pura Anyar ring rahina Buda Wage wuku Langkir.
- Wa Pura Prabu ring rahina Buda Umanis wuku Dukut.
- La Pura Batur ring rahina Purnamaning Kadasa.
- Ma Tegal Suci ring rahina Soma Pon wuku Sinta.
- Ga Pura Kahyangan ring rahina Werespate Umanis wuku Dunggulan.
- Ba Pura Dalem Puri Puser Jagat nemonin Purnama sasih Kapat
- Nga Pura Panti Prabhu ring rahina Buda Umanis wuku Peangbakat
- (10) Panemayan patirtan ring pura-pura ring ajeng madudonan sakadi ring sor:
- Ha Pura Kahyangan tiga, Puseh Sanggulan, Gunung Agung, Pura Anyar, Pura Kahyangan, Pura Panti Prabhu, nganem sasih nadiang.

Na Pura Banyelawang, Pura Nataran, Pura Pucak Sari, Pura Tegal Suci,  
miwah Pura Batur Pura Dalem Puri Puser Jagat, nganem bulan  
piodalan alit, ngawarsa nadiang.

Ca Panamaya patirtan ring ajeng nenten satata manggeh, prade wenten  
pariindik seosan.

(11) Pangaci ring kahyangan inucap manut kecap sastra agama, saha  
kalaksanayang nista, madia, utama, nganutin kawentenan lan pararem  
krama desa.

### **Paos 35**

(1) Ring pura-pura inucap ring ajeng kawentenang pamangku, sarati lan  
sutri.

(2) Ngadegang pamangku, serati, lan sutri manut dudonan sakadi ring sor:

Ha Nyanjan utawi nunas pawuwus.

Na Ngwilang saking turunan (ngwarsi).

Ca Pilihan krama desa.

(3) Sajeroning ngamargian swadharmannyane, pamangku kengin kasanggra  
antuk panyade manut kabuatang.

(4) Sane tan wenang adegang pamangku, serati, lan sutri luire:

Ha Sane cedangga, minakadi: peceng, bongol, miwah sakancannyane.

Na Keni gering ila, luire: ayan, edan.

Ca Tan ngugonin daging agama.

(5) Prabea upakara ngwintenang utawi adiksa widhi marep ring pamangku,  
panyade, serati, miwah sutri ring kahyangan desa kamedalang manut  
pararem desa adat.

- (6) Rikala amor ring acintia (mantuk), pamangku kahyangan tiga kaupakaren antuk desa adat manut pararem.

### **Paos 36**

Tetegenan pamangku, panyade, serati, sutri, soang-soang sakadi ring sor:

- (1) Tetegenan Pamangku:

Ha. Nuntun ngenterang krama desa ngamanggehang kasucian kahyangan.

Na. Mungguh-tedun palinggih kahyangan panyiwian desa miwah ngiasin pralingga manut pamastikan prajuru.

Ca, Nuntun saha niwakang lan ngilenin yadnyan krama desa ring kahyangan panyiwian desa.

- (2) Tetegenan Serati ring desa:

Ha. Ngenterang krama desa sejeroning midabdabin upakara yadnya manut pamastikan prajuru.

Na. Nyanggra pamangku-pamangku sajeroning ngilenang upakara yadnya ring desa.

- (3) Sutri tanmari ngamanggehang kasucian kahyangan desa.

### **Paos 37**

- (1) Mungguing pikolih pamangku, panyade, serati, miwah sutri kasulurang manut pararem desa adat.

- (2) Prade kahanan mangku, balu, kalaning ngalap rabi malih polih prabea nyuciang saking desa adat manut pararem.

### **Paos 38**

Pamangku, panyade, serati, lan sutri kengin kagentosin manut sulur lan pararem desa.

### **Paos 39**

- (1) Rikala patirtan ring pura, krama desane sane pedek tangkil ngaturang bhakti patut mawastra makampuh maumpal lan destar. Prade ngaturang ayah kengin mapangangge adat, sanistane maselempot wiadin masasenteng.
- (2) Rikala piodalan ring kahyangan tiga, pangemong ayah sajeroning wali sakeng krama manut pagilir.
- (3) Krama desa seosan patut ngebekang ngaturang bhakti ka pura kaetang antuk prajuru banjar soang-soang (mapeed).
- (4) Prade pacang muspa, mangda tragia makta sarana sakadi sekar, kawangen, miwah asep.

### **Paos 40**

Kasukertan kahyangan kadi ring sor:

- (1) Tan kalugra ngranjing ka pura:

Ha Sang cuntaka sangkaning sebel raga utawi kalayuan luire :

- 1) Sebel kalauan salami roras rahina sane ngarepin miwah tigang rahina sane seosan.
- 2) Sebel kandel sangkaning ngraja salami dereng mabersih.
- 3) Sebel ngrabasang/ngamijilang anak alit utawi karuron salami akambuhan istrine, miwah sang lanang ngantos kepus udel.

Na Sahanan jadma patita, luire:

- 1) Sang embas tan pariangken wayahnyane.
- 2) Jadma mobot kasanggaman tan sinangaskara.
- 3) Jadma edan miwah candala seosan sadurung kalukat kaprayascitan manun agama Hindu.

Ca Jadma sane kapastikayang panten.

Makta sahanan barang sinanggeh ngaletihin manut agama, luire: tulang, getih, bok, sakaluir wiwitan watangan, layudan pitra yadnya lan sakancania.

Ra Sato agung ngawit bawi lantur satone ngagengan, sajawining kaanggen yadnya utawi rikala mapapada.

(2) Parilaksana sane tan kawenangang ring pura luire:

Ha Mamisuh miwah wak parusia sane seosan.

Na Majaljal, bilih-bilih yan kantos kanin utawi metuang rah.

Ca Mabacin, manyuh, masanggama, miwah parilaksana ala seosan.

Ra Mungguh tedun palinggih sajawaning pituduh pamangku/prajuru.

(3) Sang mamurug kadi kecaping ring ajeng, keni pamidanda pamrayascita sapatutnyane;

#### **Pawos 41**

(1) Yan wenten jadma karawuhin ring pura, kengin kapintonin prade rumasa kasumangsayan, yan tan wiakti, jatma inucap kasisipang manut pararem;

(2) Prade kahyangan kahanan durmanggala, minakadi kapanca bhaya, pamangku patut digelis nyadokang ring prajuru mangda marumang krama desa tur ngwentenang upacara sapatut nyane;

**Palet 2**

**INDIK RSI YAJNYA**

**Pawos 42**

- (1) Sang pacang mapudgala utawi madwijati, sajawaning nunas panugrahan ring sang rumawos utawi Parisada Hindu Dharma lan pamerintah patut taler masadok ring kelihan desa adat.
- (2) Kelihan inucap patut sareng nureksa nitenin mangda sulur miwah pamarginnyane yukti-yukti manut kecaping agama Hindu, minakadinniane nenten cedangga saha kasusatian mauripa, taler patut sareng nyaksinin pamargin upacara.
- (3) Prade rumasa kantun samer, prajuru inucap patut matur piuning ring sang rumawos
- (4) Sapuputnyane, kelihan inucap digelis nyobiahang ring paruman desa adat miwah ring soang-soang banjar sawidangan desa adat sobangan, indik bisekan sang diniksan miwah pangloka palasraya manut panugrahan nabenidane.
- (5) Indik busana kasulinggrihan manut pamutus Parisada Hindu Dharma.

**Paos 43**

- (1) Sang pacang mawinten makabuatan pacang mamargi ngamangkunin, nyonteng, kubayan, miwah sakaluirnyane pacang ngenterang yadnya patut masadok ring prajuru.
- (2) Prajuru inucap patut ngawas nitenin mangda pamarginnyane manut ring kecaping agama Hindu miwah dresta,

- (3) Prajuru banjar wenang ngalengin prade wenten kacihnan sasar kekecap manut angka (2) ring ajeng.
- (4) Sang tan terima ring tetiwak prajuru inucap dados nunas pamutus ring sang rumawos.
- (5) Prajuru desa patut sareng nureksain upakara utawi ngilenin sang mawinten, sapupute patut digelis kasobiahang ring paruman desa utawi banjar tegap rauhing kawenangan pangenter yadnya sane dados kamargiang manut panugrahan sang guru utawi dresta soang-soang.

#### **Paos 44**

- (1) Prajuru patut nuntun saha ngamanggalaning krama banjar ngawas nitenin sapamargin para wikune ring wewidangan desa adat pacang mikukuhing kasucian linggih Ida,
- (2) Prajuru pamekas kelihan desa adate patut digelis nguningayang ring naben sang adiksa utawi kawintenin, prade wenten kacihnan wiku sasar ring laksana mlarapan saksi ilikita bukti.
- (3) Daging pamutus sane katiwakang antuk nabennyane patut di gelis kasobiahang ring paruman desa/banjar.
- (4) Prade paniwake ring ajeng durung rumasa tatas apadang, prajuru kengin nunasang ring sang rumawos.
- (5) Pamutus tetiwak nabe sampun pastika tan kawicaranang malih.

### **Paos 45**

- (1) Krama desa/banjar patut sareng ngawas nitenin katuntun olih prajuru mangda sahanan yadnya sane kawentenang kaicen pamuput olih sulinggih utawi pinandita manut dudonan kadi kawenangan soang-soang, manut dresta.
- (2) Prade wenten nglempasin, bilih-bilih sane pastika nyumuka, prajuru wenang ngalangin utawi ngurungang yadnya inucap, prade kadurusang yadnya saha pala wesanania tan wenten kapatut.
- (3) Sang ngalempasin utawi dustania patut katiwakin pamidanda olih prajuru, agung alit manut dosania.
- (4) Prade sang katiwakang mamurug ring pamutus prajuru, wenang katunasang baos ring kerta desa sinanggeh anggen pamucuk desa tur kabaosang malih.

### **Palet 3**

### **INDIK PITRA YADNYA**

### **Pawos 46**

Dedudonan pamargin pitra yadnya sakadi ring sor:

- (1) Pangupakaran sang lampus:

Ha Mendem utawi ngaben asriakan, maka cihna pakingsan ring Ibu Pertiwi utawi ring Bhatara Brahma minakadi sangkaning nuptupang prabea, tan wenten dewasa, karya agung ring kahyangan jagat, miwah sane lianan.

- Na Atiwa-tiwa utawi upacara ngaben kalaksanayang yening sang sane mantuk sampun tanggal untu utawi maketus. Yening durung maketus, patut kaupakara nglungah.
- Ca Upacara-upacara pitra yadnya ri wusan kabenang mawasta upacara ring pitra utawi bhatara-bhatari.

#### **Paos 47**

Swadharma lan tetegenan, prade wenten sinalih tunggil krama desane lina, kadi ring sor:

- (1) Sang kaduhkitan patut:

Ha Nyadokang ring prajuru tur nunas padewasan/galah ring kelihan desa adat.

Na Ngaturang ring prajuru desa napike kapendem utawi kaaben.

- (2) Swadharmaning desa:

Ha Prajuru maritatas pamargin sang kaduhkitan, napi ke pacang kapendem napi kaaben.

Na Nepak kulkul manut paos 27 (4;Ca) ring ajeng. .

- (3) Panyanggran banjar salanturnnyane:

Ha Soang-soang krama nedunin patut manut pararem soang-soang banjar, asapunika taler prade laju kaabenang.

Na Krama banjar lanang istri ngambil pakaryan manut dresta miwah ngarombo rikala pakutangan saha mabusana adat sanistane maselempot/masesenteng.

- Ca Pamargin sawa miwah upakara mangda dabdab antar tan kengin ngarap watang lan masuara gora. Prade mamurug keni pamidanda manut pararem.
- Ra Prade murug kadi inucap ring ajeng (3) ri sampun kasadokang ring prajuru, wenang kadanda manut pararem.
- Ka Yening sawane malelet, patut ngwentenang pangabenan manut paetangan prajuru banjar soang-soang.

#### **Paos 48**

Pakutangan Sawa:

- (1) Tan wenang mendem utawi nunjel sawa miwah awak-awakan sawa ring karang paumahan, kapatutang ring sema (setra).
- (2) Yen wenten mangguh sawa utawi barang seosan sinanggeh leteh manut agama Hindu, ring wewidangan desa/banjar saha tan wenten jadma mariangken, patut matur upeksa ring prajuru desa utawi guru wiswsa, saha nyantos tur nyanggra sapituduhnia .

#### **Paos 49**

- (1) Pidabdab ngeseng/mendem sawa kasulurang kadi ring sor puniki :

Ha Kapastikayang tan dados nginepang bangbang genah pacang mendem sawa,

Na Sawan rare wawu medal, patut kapendem pramangkin ring setran rare tan ngetangang dewasa.

- Ca Sajeroning abanjaran, yen pacang mendem/ngeseng sawa lintang ring adiri arahina, ring tunggal setra, patut sane pinih tampekan kamargiang riinan.
- Ra Sajeroning arahina ring abanjaran, prade wenten pacang mendem sawa miwah ngaben, patut mendem kamargiang riin. salanturnia wawu ngilenang pangabenan.
- Da Jadma padem nandang sakit ila, sawane patut kageseng ring tepisiringin teben setra.
- Ta Jadma padem salah/ngulah pati, sawane kapastikayang riin antuk prajuru miwah sang mawang rat sadurung dados kabakta utawi karanjingang ka pakubonnyane .
- (3) Saluir gegumuk ring setra kasinanggeh nglikadin, patut kagubar antuk sang madue sawa, prade murug gegumuk inucap kengin kagubar olih krama, kaenter antuk prajuru saha tan kawicaranang.

### **Paos 50**

- (1) Prade sawane pacang kapendem/kageseng ring tunon/setra boya sawan krama desa adat patut nawur paletahan sane kabaos pananjung batu utawi panukun setra, agung alit manut pararem.
- (2) Sapasira ugi pacang mendem utawi ngeseng sawa, patut ring setra/tunon, tan dadosang ring karang pumahan, tegal, carik, lan seosan punika .

### **Paos 51**

- (1) Krama sane pacang atiwa-tiwa, patut nunas bebebaskan ring kelihan desa adat.
- (2) Prajuru inucap nitenin tur nuntun mangda jadm punika pastika tan nyantulin pasukertan desa adat, tan wenten nyepungin kasucian desa, bilih-bilih kahyangan-kahyangan.
- (3) Pidabdab nitenin tur nuntun kadi ring sor:  
Ha Prade wenten lina, sajeroning masengker awuku dados kabek katiwa-tiwayang.  
Na Atiwa-tiwa nenten kapatutang; Rikala Prewani, Purnama, Tilem, pananggal 9 (sia), pangelong 1 (pisan), 6 (nem), Buda Kliwon, Anggara Kasih, Tumpek, Kajeng Kliwon, Kala Gotongan, Semut Sadulur, makirim, nyandung lan Rikala piodalan Ida Bhatara Kahyangan Tiga.

### **Pawos 52**

- (1) Sane kasinanggeh kacuntakan sakadi ring sor :  
Ha. Cuntaka antuk seda / padem;  
Na. Cuntaka antuk ngraja sewala;  
Ca. Cuntaka antuk ngembasang putra;  
Ra. Cuntaka antuk karuron;  
Ka. Cuntaka antuk pawiwahan;  
Da. Cuntaka antuk gamia gamana;  
Ta. Cuntaka antuk salah timpal;

- Sa. Cuntaka yening wenten anak istri mobot nenten kaupakaran pabiakawonan tur pawidi widana;
- Wa. Cuntaka antuk mamitra ngalang;
- La. Cuntaka antuk wenten anak istri ngembasang putra sadurung maupakara pabiakawonan tur pawidi widana;
- (2) Sengker cuntaka manut kawentenannyane:
- Ha. Cuntaka kelayu sekaran, cuntakannyane ngantos masapuh manut dresta;
- Na. Cuntaka ngrajasewala, 3 rahina ngawit saking ngraja sewala utawi selami ngraja sewala;
- Ca. Cuntaka ngembasang putra, 42 rahina (abulan pitung dina) ngawit saking putrane embas, ngantos sampun kaupakara makambuhan tur maprayascitta manut sakadi agama, lanang wiadin istri;
- Ra. Cuntaka karuron abulan pitung dina (42 rahina) tur sampun matirta prayascita;
- Ka. Cuntaka pawiwahan, cuntakannyane ngantos sasampune matirta pabiakaonan;
- Da. Cuntaka gamia gamana, cuntakannyane ngantos sasampune kapalasang utawi masapihan tur sampun kawntenang pamrayascita raga miwah sampun kawntenang pamrayascitta desa lan kahyangan;
- Ta. Cuntaka salah timpal kaupakara manut sada cara agama hindu;
- Sa. Cuntaka anak istri mobot nenten kawntenang upakara pabiakaonan, cuntakannyane ngantos kawntenang upakara pabiakaonan;
- Wa. Cuntaka mamitra ngalang cuntakannia ngantos kawntenang upakara pabiakaonan;

- La. Ngembasang putra nenten wenten ngangkening kawentenang upakara pawidi widana, cuntaka ngantos wenten sane mameras sang putra, tur sampun kawentenang upakara manut sastra agama Hindu;
- (3) Cuntaka kalayu sekaran utawi kapademan:
- Ha. Kapendem cuntakannia:
- 1) Cuntaka utawi sebel banjar rawuhing 3 rahina ri wusan mendem utawi sasampun polih prayascitta (masapuh);
  - 2) Kulawargannia sajeroning pakarangan kacuntakan ngantos roras rahina;
- Na. Ngaben cuntakannyane:
- Sang nyambut karya Pitra Yadnya cuntakannyane ngawit saking ngrancang karya rawuhing wusan (mapegat);
- (4) Tan keneng cuntaka luire:
- Ha. Sang Sulinggih lan pamangku;
- Na. Rikala wenten piodalan;
- Ca. Kelihan Desa/Bandes Adat/Klihan Banjar Adat saha maprayascitta;

#### **Palet 4**

### **INDIK MANUSA YADNYA**

#### **Pawos 53**

- (1) Manusa yadnya inggih punika upacara-upacara dharmaning manusa ngawit saking patemoning kama petak kalawan kama bang, sajeroning garban i biang kantos lampus ri wekas .
- (2) Upacara ring ajeng madudonan kadi ring sor :

- Ha Magedong-gedongan duk pangerempinian i biang, manawi yusa bobotan 3-4 wulan.
- Na Duk sang kamareka medal.
- Ca Kepus Udel (puser).
- Ra Nglepas aon ri sampune rare mayusa 12 dina.
- Ka Akambuhan, rare mayusa 42 rahina,
- Da Tigang sasih utawi nyambutin.
- Ta Pawetuan ri sampun enem sasih,
- Sa Ngempugin ri kala wawu tumbuh untu.
- Wa Makupak utawi maketus, upacara sasayut pangerti suara.
- La Mungguh daha teruna, ngembakin lanange, ngaraja wadonne
- Ma Mapandes/matatah.
- Ga Mawiwaha utawi madengen-dengen ring pagrehastane.
- Ba Mawinten nunas panugrahan Sang Hyang Haji Saraswati.
- (3) Upacara-upacara soang-soang ring ajeng nista, madia, utama nganutin sastra agama miwah catur dresta, maka buatan drestane, ngawinayang sima cara desa adat Sobangan.
- (4) Upacara pawintenan manut kadi paos ring ajeng, miwah upacara pawiwahan, manut paos ring sor.

#### **Palet 5**

### **INDIK BHUTA YADNYA**

#### **Pawos 54**

- (1) Bhuta yadnya inggih punika upacara upakara pabeakalan ring pertiwi lan kahyangan, sarwa prani saha upacara ning bebhutan.
- (2) Upakara pabeakalan ring sarwa prani, luire :
  - Ha Tumpek pangarah/pangatag nemonin Saniscara Keliwon Wariga, upacara majeng ring sarwa tumuwuh saking pura Malanting soang-soang banjar kadi ring ajeng.
  - Na Tumpek Andang/Uye, nemonin Saniscara Keliwon Uye, upacara majeng ring ingon-ingon.
  - Ca Upacara pakalan-kalan manusa manut wiguna, ketah kabaos pabeakalan.
- (3) Upacara upakara pabeakalan ring pratiwi lan kahyangan saha ring babhutan kawastanin macaru.
- (4) Pacaruan inucap ring ajeng nista, madia, utama manut wiguna kadi ring sor:
  - Ha Ekasata antuk ayam brumbun asiki.
  - Na Pancasata.
  - Ca Panca sanak
  - Ra Pancakelud
  - Ka Rsi Gana
  - Da Tawur kasanga.
- (5) Seosan ring sane sampun katur ring ajeng, kawentenang upacara Yadnya Sesa utawi masaiban nyabran wusan maratengan.

## Paos 55

Upacara tawur kadi ring sor:

(1) Majeng ring Ida Bhatara patut:

Ha Pangelong ping roras, nyejerang Ida Batara ring Bale Agung.

Na Palelastian kapatutang:

- 1) Pangelong ping telulas kasanga, malastiang Ida lunga ka segara.
- 2) Pangelong ping patbelas, Ida Bhatara nyejer ring Bale Agung.
- 3) Ring tileming kasanga nyoreang, Ida Bhatara kairing ka joga soang-soang.

Ca Upakara kaetang antuk prajuru:

- 1) Pidaging upakara kakaryanin antuk banjar, kasanggra antuk prajuru.
- 2) Wali tetabuhan manut pagiliran banjar.

Ra Sajawaning juru songsong, juru tedung, juru bandrang, prajuru banjar pamucuk, pagarapan upakara miwah krama banjar sane ngamedalang tetabuhan, krama banjar seosan patut ngiring malastiang Ida Bhatara tur prade cedok tan kapiambeng keni pamidanda manut pararem.

(2) Upakara tawur manut kadi ring sor:

Ha Ring tileming kasanga kawastanin tawur kasanga ketah kabaos ngrupuk/nogtog pacang magpag rahina panyepian benjangne.

Na Pacaruan manut pararem:

- 1) Ring desa sanistane Ekasata.
  - 2) Ring lebu soang-soang krama masegeh agung manut arah-  
arahan.
- Ca Ri tepengan ngrupuk nyoreang, tan kengin langkungan ring tengah wengi riantukan dauh inucap maka panampih rahina benjangne, inggih punika sampun rahina panyepian.
- Ra Tatacara ngrupuk mangda mamargi trepti katureksain antuk prajuru, lan pacelang prade marug keni pamidanda manut pararem

#### **Paos 56**

- (1) Pamargin panyepian nganutin catur brata panyepian kadi ring sor :
- Ha Amati geni, tan kengin maapi-api, sajawaning:
- 1) Sang madue rare durung tigang sasih, ring genah rare inucap.
  - 2) Sang matepetin ring genah sang sungkan.
  - 3) Sang nuenang layon ring genah sawannyane.
- Na Amati karya tan kengin wiadin tan wenang nglaksanayang sahananin karya,
- Ca Amati lelungan, tan kengin malelungan, sajawining pacelang lan prajuru desa, miwah sang polih uak-uakan utawi izin, antuk ilikita pastika saking guru wisesa.
- Ra Amati lelangan, tan kengin nyuarayang sahanan sane ngeranayang ngulangunin, utawi sane siosan.

- (2) Prade mamurug brata panyepian, keni pamidanda manut pararem sane kamargiang antuk pacelang, pamidanda inucap kapah tiga, soang soang polih apah tigan, desa adat, pacelang miwah prajuru.
- (3) Riwus rahina Nyepi kawastanin Ngembak Geni, mapiteges Panglukaran Yoga Semadi, kadulurin antuk ngaksama soang-soang krama desa maka cihna pangawit icaka warsa.

**SARGAH LIMA**  
**SUKERTA TATA PAWONGAN**

**Palet 1**

**INDIK PAWIWAHAN**

**Pawos 57**

- (1) Pawiwahan inggih punika patemoning purusa lan pradana kadulurin antuk kayun sukacita, tur ngangken upa saksi sakala niskala.
- (2) Pamargin pawiwahan wenten tigang soroh luire
  - Ha Pepadikan, kamanggalanin antuk pakrunan.
  - Na Ngrorod, ngrangkat riin, wawu kakrunayang.
  - Ca Nyentana, risampun katetepin antuk upakara wiadin upacara pamerasan.
- (3) Pawiwahan utawi alakirabi ring desa punika ngamanggehang undang-undang No.1 warsa 1974, miwah Peraturan Pemerintah No, 9 warsa 1975. Saha pasuaran Gubernur Bali.

**Paos 58**

Sulur ngrorod kadi ring sor:

- (1) Pidabdab sang pacang ngrorod patut:

- Ha Sampun manggeh daha teruna.
- Na Sangkaning pada arsa/rena.
- Ca Manut kecaping agama, tan kasengguh gamyu.
- Ra Prade pangambile matiosan agama, kamanggala antuk banten panyambutan.
- Ka Asapunika taler prade pangambile asumundung anglangkahi karang ulu, kasukserah ring tri manggalaning yadnya, sakewanten tan ngirangang pangaptin sang ngwarangang ping ajeng sang manggeh purusa ngamargiang upacara patiwangi.
- (2) Sapasira ugi pacang ngwarangang pakulawargan patut masadok ring prajuru sane maritatas, manut tan manut pakecap pawiwahane.
- (3) Pamargin parorodane patut:
- Ha Krama sane nampi parorodan patut pramangkin masadok ring kelihan banjar.
- Na Kelihan banjar patut digelis netes sang ngrorod maka buatan marityaksayang manut utawi singsal pamargine ring dresta.
- Ca Bilih sampun manut, sang ngarorod miwah sang nampi polih pasayuban prajuru desa.
- Ra Prade tan manut ring dresta, kelihan banjar patut digelis malasang, sang kinira-kira katetehin kawehin pasayuban ring jeron kelihan.
- Ka Kelihan banjar digelis ngutsahayang matuhu wirang ring sang katetehang, prade genahnyane doh utawi ring dura desa usaha katumusang ring sang rumawos, luire: polisi, camat ping ajeng perbekel.

Da Sang mamiseka ri sampun kaparitas wasta miwah umahnyane patut katundung saking wewidangan desa/banjar.

Ta Krama sane nampi patut katureksa manut ring pakertinnyane prade saruron ring sang corah utawi nyarengin mamiseka, wenang danda agung alit manut pararem desa.

### **Paos 59**

Tatacara netes kadi ring sor:

(1) Sang masaserep pacang netes parorodan, patut masadok tur nunas panuntun ring Kelihan Banjar.

(2) Kelihan Banjar patut:

Ha Nureksa natasang saserep punika jati tan jatine patut pernah wirang ring sang karorod.

Na Prade manut panglokika jati pernah wirang digelis ngater saserep punika ka genah sang karorod.

(3) Sang masaserep patut tinut ring sapituduh nganinin tata netes parorodan:

Ha Ngranjing ka umah inucap tan langkungan ring tigang diri,

Na Tan kengin makta gegawan saka luire.

Ca Tan kengin matingkah miwah mabaos parusia/nantang.

(4) Sarawuhe I Kelihan patut midabdabin mangda tata cara panetes sida trepti maka buatan mangda anake istri sane karangkat jati-jati polih nerangang idepnyane sangkaning lila, luire :

Ha Anake istri kagenahang ngraga, tan dados anak seosan nampekin, mangda tinas ring inange.

- Na I Kelihan nuntun nyulurang mangda sang masaserep polih mataken ring sang istri punika .
- Ca I Kelihan nyumakutayang pamekas ring anake istri yan pada arsa parorodane mangda sang masaserep matulak, taler sangkaning pada arsa.
- (5) Pamutus I Kelihan dumogi lumaksana manut ring pamutus idep anake istri inucap, yan tan matur upeksa ring I Kelihan, sang nampi miwah sang ngorodang kadanda agung alit manut parerem.
- (6) Yening piwal ring pidabdab alakirabi inucap ring ajeng, wenang kadanda manut pararem.

#### **Paos 60**

- (1) Pawiwahan sane kapatutang ring desa adat Sobangan, kacihnayang:
- Ha Pawidi-widanan, sanistane pabeyakalan.
- Na Kasaksinin olih prajuru adat lan dinas.
- Ca Kaungguhang sajeroning pailikitan banjar tur katumusang ring sang rumawos utawi camat .
- (2) Parabian kabaos tan patut, prade :
- Ha Natab upakara saking pepaksan.
- Na Nenten wenten saksi miwah ilikita.
- Ca Sinalih tunggil tan rawuh saha tan wenten ilikitannyane

#### **Paos 61**

- (1) Prade wenten parilaksana ngawinang cemer desa adat, luire:

- Ha Dretikrama miwah para dara utawi nyolong samara ngantos kadapetan, kengin kasadokang olih rabinnyane majeng ring prajuru.
- Na Mamitra ngalang utawi mlaksana sakadi mapikuren, kemaon nenten mawidiwidana, wenang kasadokang olih krama desa ring prajuru.
- Ca Daha mobot nenten sangkaning pawiwahan, patut kasedokang ring prajuru olih kulawargannyane.
- (2) Ri sampun kapitatas antuk prajuru saha kabaosang ring para anggan pamucuk desa. sane manggeh kertadesa, macihna manut tri pramana, pasadok inucap wenang katiwakang pamidanda kadi ring sor:
- Ha Sang dretikrama utawi paradara patut ngawentenang panyapsap mala antuk pamarasyascita, manut sima miwah ngalasyayang pamargi cemer inucap.
- Na Sang mamitra ngalang, mangda mawiwaha tur ngrebu desa manut pararem.
- Ca Sang mobotang mangda ngambil kania/daha inucap antuk pawidi widana sajangkepnyane, prade tan manut nyakapang, keni panyudamalan desa, saha pangupakara bobotan nglantur ngupajiwen lan ngweruhang embasan bobotan inucap ngantos daha/teruna riwekas.
- (3) Prade pratingkah ring ajeng ngantos katumusang ring sang mawang rat, luire polisi rawuh ka Pangadilan Negeri mawastu sang lumaksana kasisipang iwang manut pamutus Pengadilan, sakewanten prade durung nyihnayang pangrajejan kasudamalan desa manut panyisip angka (2) ring ajeng ri sampun sang mlaksana ngamargiang pamutus saking Pangadilan inucap taler pamuput panyisip ring desa patut kamargiang.

- (4) Prade tan manut ngamargiang panyisip kadi angka (3) wenang kapegatin suaran kulkul ring saurah-arih parilaksana suka duka kulawarga sane ngundulang sang mlaksana cemer inucap.

## **Palet 2**

### **INDIK NYAPIHAN LAN WALU**

#### **Pawos 62**

- (1) Palas parabian riantukan silih sinunggil lampus mapiteges balu.
- (2) Palas parabian malarapan wicara, pracihna tan tumus sukacitaning panunggalan idep sang alakirabi, kapiteges nyapihang.
- (3) Palas parabian manut angka (2) ring ajeng patut atur upeksa pailikitan ring sang rumawos/Pangadilan wastu tinas apadang pamutus kabaos nyapihang katumusang ring sang ngawiwenang utawi camat nglantur prajuru nyobiahang kawentenannyane ring desa.

#### **Paos 63**

Prade ri wekas sang palas kacihnan adung malih tur pacang mawiwaha, patut ngamargiang upakara pawiwahan manut paos (55).

#### **Paos 64**

Swadharmaning balu patut kadi ring sor:

- (1) Nguasayang waris, pagunakayan, tan kengin ngadol, ngadeang, makidihang sajawaning kabebasan antuk pianak utawi kulawarga purusa pinih tampek prade pianaknyane kantong alit-alit,

- (2) Kengin ngidih sentana prade sampun wenten paigum/pidabdab sadurung sinalih tunggil lampus saha kacumponin antuk kulawarga sinanggeh purusa,
- (3) Kawenangang mawiwaha malih prade sampun polih paigum saking pianak daha/teruna utawi kulawarga purusa pinih tampek prade okane kantong alit-alit.

**Palet 3**  
**Indik Sentana**  
**Paos 65**

- (1) Mungguing sentana wenten kabaos pretisentana miwah sentana peperasan.
- (2) Prade wenten embasan bobotan tan sangkaning pawiwahan, mangda tan kabaos astra utawi bebinjat patut kawentenang upakara pamarayascita.
- (3) Prade ring pawiwahan tan wenten pretisentana, kadadosang ngidih sentana maka dasar paigum kulawarga, saha upasaksi sekala niskala sane kabaos sentana peperasan.
- (4) Prade sinalih tunggil krama ngamedalang oka, mangda sajeroning tigang rahina sampun kasadokang ring Kelihan.
- (5) Kelihan Desa patut:  
Ha Ngilikitayang sang embas inucap.  
Na Nyuarayang kulkul.
- (6) Prade rare kembar lanang istri karumasayang cihna kadurmanggalan, desa adat patut ngawentenang pamrayascita ring desa utawi ring genah sane ngamedalang rare inucap,

### **Paos 60**

- (1) Mangda kapatut pangidih sentana punika, patut kakaryanin upakara pamerasan makadi saksi sekala niskala.
- (2) Sapasira ugi krama sane pacang ngangkat sentana, patut ngwentenang pasadok ring prajuru, sakirangnyane asasih sadereng pamerasan.
- (3) Salanturnia kelihan patut nyobiahang ring desa sapasira rumasa tan lila mangda nyadokang ring kelihan sanistane awuku sadereng kakaryanin upakara pamerasan.
- (4) Prade wenten pikobet utawi wentwn tan cumpu ring pangangkatan inucap, kelihan desa mangda digelis maosin saha micayang pamutus manut dresta miwah pararem.

### **Paos 67**

- (1) Sulur mangda dados kaangkat pinaka sentana luire :
  - Ha Magama Hindu.
  - Na Yusane alitan ring sang ngangkat.
  - Ca Ping ajeng kulawarga saking purusa, prade tan wenten kengin saking predana taler tan wenten, kadadosang saking patunggalan soroh, prade tan wenten, kadadosang saking anak seos.
  - Ra Ngangkat sentana kengin lintang adiri yadiastu lanang wiadin istri.
- (2) Pangangkatan sentana utawi pamerasan sane sinanggeh pamatut :
  - Ha Ri sampun mawidhi-widana.
  - Na Kasaksinin antuk prajuru desa lan dinas.
  - Ca Salanturnyane kelihan nyobiahang ring paruman desa.

**Palet 4**  
**Indik Warisan**

**Paos 68**

- (1) Warisan inggih punika tetamian arthabrana miwah ayah-ayahan sane sekala lan niskala patinggalan pawaris utawi sang lampus,
- (2) Sane kabaos warisan luire:
- Ha Due tengah minakadi karang paumahan, sanggah wiadin merajan, tegal lan carik.
- Na Utang-piutang,
- Ca Ayah-ayahan desa.
- (3) Wawu kengin kabaos wenten warisan prade:
- Ha Wenten pawaris utawi sang mapiturun.
- Na Wenten ahli waris utawi keturunan.
- Ca Wenten arthabrana warisan/tetegenan utawi ayah-ayahan pinaka warisan.

**Paos 69**

- (1) Sang sinanggeh ahli waris luire:
- Ha Pratisentana sakeng purusa.
- Na Sentana rajeg
- Ca Sentana pamerasan,
- (2) Prade tan wenten ahli waris kadi angka (1) ring ajeng, kadadosang ahli waris:
- Ha Turunan purusa rajeg makadi rerama misan mindon,

Na Turunan purusa ka samping luire keponakan, misan, mindon.

Ca Yan tan wenten kadi ring ajeng wawu kengin kulawarga predana,

### **Paos 70**

Swadharmaning ahli waris luire:

- (1) Nerima miwah nguasayang tetamian saking pawaris minakadi ngemponin merajan/Pura parahyangan miwah nglanturang ayah-ayahan saking pawaris.
- (2) Pitra yadnya utawi ngabenang pawaris.
- (3) Naurin utang pawaris.

### **Paos 71**

- (1) Pamargi pangepahang warisan inggih punika risampun kamargiang pitra yadnya saha utangnyane buntas kataur.
- (2) Para ahli waris polih pah-pahan, sajawaning karang ayahan desa kakuasayang antuk ahli waris kantos kapungkur.
- (3) Ahli waris tan polih pahan prade:

Ha Sentana rajeg kesah mawiwaha lan sentana nyeburin ketah kabaos ninggal kadaton.

Na Alpaka guru upami marahaken mayapati pawaris.

Ca Ninggal swadharmannyane lan matilar guru swadiaya/agama.
- (4) Prade boya ahli waris kengin muponin arta warisan luire:

Ha Jatma luh sane durung kesah mawiwaha.

- Na Prade jatma luh inucap ngembasang oka tan sangkaning pawiwahan okane inucap tan kengin ngwarisin artha brana sajawaning pikolih pamupon biange kemaon.
- Ca Balu luh utawi muani nyeburin.
- Ra Mulih daha utawi ka umah uwedan.
- (5) Paweweh pawaris ri kala maurip kadabdab kadi ring sor :
- Ha Jiwa dana tadtadan/bekel ring pianaknyane sane kesah mawiwaha.
- Na Pangupa jiwa paweweh padgatakala pawaris marupa muponin kemaon.
- Ca Padum pamong/pedum raksa pahan pawaris padgatakala ngantos padum pastika arta warisan majeng ring ahli waris.

## **Paos 72**

- (1) Prade ahli waris langkung ring adiri patut:
- Ha Kapigumang pamargi pangepahan warisan.
- Na Prade tan prasida pigum kengin nunas pamatut prajuru desa.
- Ca Prade taler tan wenten cumpu ring pamatut prajuru desa, dados katumusang ring sang rumawos utawi Pangadilan.
- (2) Prade wenten karang kaputungan, prajuru desa wenang maosin tur nureksa sila-sila pawaris tur ngepahang ring :
- Ha Ahli waris ring purusa.
- Na Turunan ka samping prade tan wenten turunan rajeg.
- Ca Prade tan wenten taler turunan rajeg kengin katiwakang ring lintihan predana.

- Ra Taler tan wenten kadi ring ajeng, dados katiwakang ring krama patunggilan/wedan desa adat Sobangan sane magama Hindu.
- Ka Pahan karang punika tan dados kapingayang ring krama sane sampun nanggap karang desa.
- (3) Prade panureksa prajuru desa sampun kamargiang kadi ring ajeng, salanturnyane nganem wulan pasangkepan desa adat taler pawaris nenten sumanggup ngayahang karang desa inucap patut karang ayahan kacabut antuk desa, desa patut mreteka pawaris sane pecak ngemong karang inucap sapatutnyane

**Palet 5**  
**Indik Tulung – tinulung**  
**Paos 73**

- (1) Prade krama desa ngwentenang pasubaya sajeroning pangupa jiwa luire:
- Ha Antuk nanggap tanah tegal/carik wiadin madunungan ngaryanin pakubon ring tanah krama desa seosan.
- Na Utawi makadasang ingon-ingon mangda prasida nganutin kawentenan uger-uger pemerintah, bilih mabuat pisan patut kawentenang ilikita lan panyaksi prajuru desa adat lan dinas, mangda tan ngawinang pocol sinalih tunggil krama, saha jati-jati pada arsa majalaran paramatulung.
- (2) Pariindik pikolih padana punia sane kadrue antuk desa pinaka kas sane kamargiang mangda nganutin uger-uger pemerintah sane kabaos koperasi turmaning mangda nenten kantos ngawetuang wicara ring desa, mawiwit tan ngawaliang saselangan krama manut pasemaya.

- (3) Mungguing tulung-tinulung pakaryan sane lianan mangda karajegang tur kaanutang ring kawentenan panemaya.

## **SARGAH NEM**

### **SUKERTA TATA PALEMAHAN**

#### **Palet 1**

### **INDIK KARANG**

#### **Pawos 74**

- (1) Sahanan karang paumahan patut:
- Ha Pastika wenten pawatesnyane;
- Na Mapamedalan ka rurung.
- (2) Kelihan Desa patut ngutsahayang mangda sami pakarangan warga desa kadi inucaping ring ajeng.
- (3) Sahanan krama patut ngwatesin karangnyane soang-soang ngantos sida trepti nyatur desa.
- (4) Wates karang sane majepitan patut kategen antuk krama sane mauluan kawetes inucap manut dresta, sane sampun madesa miwah mabanjar adat.
- (5) Telajakan karang soang-soang krama patut kapiara antuk krama sane nruenang pakarangan.
- (6) Margi-margi ring ajeng karang krama patut kapiara antuk krama desa saha kasarengin antuk krama soang-soang sane nlajakin karang punika, miwah tan wenang ngembahang toya pangutangan ka karang panyanding.

**Palet 2**  
**INDIK PEPAYONAN**  
**Paos 75**

- (1) Taru miwah woh-wohan sane maurip ring wates, kadruenang olih krama sane negen wates inucap.
- (2) Tanem tuwuh sakaluire tan wenang ngungkulin utawi mayanin miwah ngawinang pocol krama panyanding.
- (3) Prade wenten kadi mungguh ring angka (2) ring ajeng, wenang kasepatgantungin saha katatas olih krama sane nruenang tanem tuwuhe punika manut tatacara :
  - Ha Krama madrue tanem tuwuh mayanin panyanding patut atur upeksa ring prajuru, mangda nyaksinin kalaning notor utawi ngarebahang tarune.
  - Na Atur upeksa ring prajuru nunas galah panemaya pacang nelasin,
  - Ca Sadurung ngalintangin galah, prade tanem tuwuhe punika rebah tanpajamiga manawi sangkaning linuh, angin baret, lan sakancannyane, sang nruenang luput saking kaiwangan.
  - Ra Tanem tuwuhe sane rebah inucap wenang katawan antuk sang keni baya.
- (4) Saluiring tanem tuwuh ngungkulin utawi mayanin panyandingnyane, panyepat gantunge wenang maren utawi ngajeroang 1,5 meter saking wates.
- (5) Saluiring tanem tuwuh sane mayanin patut negen prabea prade sampun kasadokang ring prajuru saha wiakti mayanin. Tanem tuwuh inucap kaambil olih sang keni baya.

(6) Prade tanem tuwuhe sinanggeh mayanin manut pangenten sang katetehan patut:

Ha Kapademang antuk sang sane nruenang taru inucap.

Na Kapademang antuk prajurune, prade sang nruenang tan nginutin pangenten sang katetehan.

(7) Tanem tuwuh sane embas ring wates, patut kapademang antuk prajuru, prade ngwetuang wicara. Tarunnyaane kapah tigan: asiki dados druen desa, kakalih katiba ring sang mawicara.

#### **Paos 76**

(1) Ngawit nanem/nandur pepayonan, patut adepa agung ngajeroang saking wates.

(2) Wit taru sane embas sajeroning wates, tan kalugra ngalintangin wates, bilih-bilih mawastu mayanin panyanding.

(3) Pamidanda panyangaskara saha prabea sangkaning ngarubuhin wewangunan, katiba ring:

Ha Sang nuenang wit taru sane sinanggeh mayanin prade ngrubuhang wewangunan panyanding.

Na Sang notor miwah monggol utawi ngrebah wit taru inucap, prade ngarubuhin wewangunan panyanding.

Ca Panyangaskara inucap sanistane prayascita tur mecikang wewangunan sane karusakang.

### **Palet 3**

## **INDIK WEWALUNGAN**

### **Paos 77**

- (1) Tan wenang nglumbar wewalungan ring pakarangan, bilih-bilih ngantos ngrusak pakarangan panyanding, miwah kahyangannyane.
- (2) Sahanan krama desa sane miara wewalungan patut sayaga nitenin negul utawi nglogorin.
- (3) Prade wenten ngeleb saha ngranjingin pakarangan seosan, sang madrue karang kengin ngalungguhin ring sang madue wewalungan. Samaliha, yan kantos ngawinang karusakan, patut numusang bebaos ring prajuru. Prajuru wenang niwakang pamidanda ring sang madue wewalungan Agung alit pamidanda inucap kaanutang ring dosane.
- (4) Prade ring asasih kantos ping tiga sampun malungguhang, wewalungan punika wenang kataban, tur sang naban patut matur uning ring prajuru.
- (5) Sang nruenang rewalungan inucap patut nebus kadulurin antuk danda manut karusakan miwah prabea sane kalogikang antuk pararem.
- (6) Yan kantos ping tiga kataban, wewalungan inucap wenang kaleleb wiadin tan dados katebus malih.

### **Paos 78**

- (1) Prade wenten wewalungan ngranjing ring kahyangan, sang nruenang wewalungan inucap kadanda prabea lan upakara pamarisuda manut pararem.

- (2) Prade wenten wewalungan keni kataban, sakemaon nenten wenten sane ngangkenin masue tigang rahina, wewalungan inucap patut kaaturang ring prajuru desa.
- (3) Prajuru desane patut ngawentenang gatra ring pradesa seosan.

#### **Palet 4**

### **INDIK WEWANGUNAN**

#### **Paos 79**

- (1) Wewangunan patut:  
Ha Ngangge gegulak asta kosala-kosali, sanistane manut patitis niskala.  
Na Tan kawenangan ngayubin wewangunan panyanding.
- (2) Prade kantos ngayubin, ri sampun kasadokang ring prajuru keni pamidanda manut pararam.
- (3) Prade wewangunane kawangun ring tepisiringin wates, saderenge patut kawentenang paigum ring panyanding tur kasadokang ring prajuru desane. Prade mamurug wenang kagubar antuk sang madrue saha tan polih prabea kapocolan.
- (4) Prade wewangunan kadi ring ajeng (3) sampun polih paigum ring panyandaingnyane, kengin nganggen abangan saha toyan cacapannyane katiba kajero.

#### **Palet 5**

### **INDIK BAYA**

### **Paos 80**

(1) Bacakan pancabaya luire:

Ha Jiwa baya, upami: kabaak miwah sane seosan.

Na Arta baya, upami kamalingan.

Ca Geni baya, upami kapuunan (umah puun).

Ra Kaplagandangan.

Ka Duracara ring agama, upami kanistayang agama.

(2) Sahanan warga desa patut digelis atur uning ring prajuru, prade uning ring kawentenan jatma malaksana pancabaya.

(3) Prade dahat sarat kawentenannyane, kengin nepak kulkul pamitulung manut rupan bayane.

### **Paos 81**

Tata caraning maseserep, kadi ring sor:

(1) Warga desa sane kaicalan, prade pacang maseserep patut nunas panugrahan miwah panuntun kelihan desa.

(2) Prade genahe maseserep ka duradesa, patut nunas uak-uakan saking kelihan desa sane ngwawa genahe maseserap inucap.

(3) Kelihan desa inucap ngicen panuntun mangdane tatacara maseserep manut ring dresta,

(4) Sahanan warga desa, prade polih nuduk barang sakaluire ring wewidangan pura utawi bale desa, patut matur uning ring kelihan desa.

- (5) Kelihan desa patut nyobiahang barang dudukan inucap mangda sang nruenang ngwantu ngulihang barangnyane, tur sang mariangken mangda mrasidadayang nyihnayang barang inucap mula wantah druenyane.
- (6) Prade barang sane ical ring wewidangan sakadi ring angka (4) ring ajeng tan prasida kapanggih, sang kaicalan kengin nunasang ring prajuru mangda ngecorin krama desa utawi sinalih tunggil kramane sane kadalih

**SARGAH PITU**  
**WICARA LAN PAMIDANDA**  
**Palet 1**  
**INDIK WICARA**

**Pawos 82**

- (1) Sane wenang mawosin makadi muputang wicara ring desa luiripun :  
Ha Kelihan desa, prade sang mawicara patunggilan desa.  
Na Kelihan desa, prade sang mawicara mabinayan bebanjaran.
- (2) Prade sang mawicara tan wenten cumpu ring tatacaran kelihan banjar sane mawosin, kengin nunas tetimbangan ring kelihan desa.
- (3) Prade taler tan wenten cumpu ring pamuput kelihan desa, kengin katumusin tetimbang ring kerta desa maka anggan pamucuk desa, saha pamuputnia tan kawicaranin muah.
- (4) Pamuput ring desa, prade tan kacumponin kasukserah ring sang mawicara numusang ring Guru Wisesa utawi Pengadilan.
- (5) Yening wenten sinalih tunggil krama sane mapakardi wak parusia majeng ring pamangku miwah prajuru desa patut ngupakara panyapuh jagat.

### **Paos 83**

- (1) Sahanan wicara sane mawiwit kacorahan sahaluire miwah sinanggeh nungkasin awig-awig, pasuara, lan pararem desa patut pramangkin kabawosin tan nyantos pesadok.
- (2) Sajaba wicara kadi ring ajeng patut nyantosang pasadok sang nunas bawos.
- (3) Panepas kerta desa pinaka swadharmaning paniucuk desa mapaweh tetimbangan mangda pastika nyantenang iwang patut mlarapan tri pramana luire: saksi, ilikita, bukti. saha tan maren nepek ring dresta.
- (4) Sahanan pamutus sane katiwakang kadi ring ajeng tan wenten tiwal ring awig-awig, dresta, utawi pararem mlarapan dharma tula.

### **Palet 2**

#### **INDIK PAMIDANDA**

### **Paos 84**

- (1) Desa wenang niwakang pamidanda ring warga desa sane sisip.
- (2) Paniwak inucap kamargiang antuk kelihan desa nunggal-nunggal manut dudonan sakadi ring sor :
  - Ha Kaping ajeng kapakelingin mangda nuntasang katengenang utang utawi kaiwangan.
  - Na Risampun kapatinget kantos makudang sangkepan :
    - 1) Utang arthabrana kengin kamargiang rampagan.
    - 2) Ring kaiwangan tiosan arthabrana kapakelingin malih pisan.

Ca Risampun patinget ring ajeng kamargiang, taler sang sisip tan wenten usaha, ngentosin solah maprawerti wenang krama inucap kapegatin suaran kulkul utawi kasepekang desa.

(3) Agung alit pamidanda masor singgih manut kasisipan tan maren ngupadi darma kawolas arsan, pinih ajeng ngawantunang kasudamalan desa.

(4) Bacakan pamidanda luiripun:

Ha Danda arta miwah panikel-panikelnia kantos ngarampang

Na Kapekelingan.

Ca Panganpura/panyuaka.

Ra Upakara panyangaskara.

Ka Kasepekang makrama.

(5) Jinah utawi arthabrana pamidanda ngranjing dados druen desa.

### **Paos 85**

(1) Rikala pawanengan ngamedalang jinah papeson dedendan utawi dodosan, yening celed keni danda nikel, asapunika taler yan tan ngaturang pikolih-olih tanah desa.

(2) Risampun keni nikel mawaneng malih asangkepan taler tan kataur, wenang katampag manut ring sor:

Ha Kamargiang antuk prajuru kamiletin antuk krama akehe tigang diri.

Na Tan ngarampang barang sane patut inggilang manut agama miwah ngamademang pangupajiwana sang karampag luire :

1) Sane tan kawenangang:

- Barang sane anggen ngarateng utawi anggen nincapang pangupajiwa makadi sarana ka carik/tegal.
- Sarana kaanggen ngamargiang upacara agama.

2) Sane wenang karampag :

- Wewalungan suku patpat iniwah suku kalih.
- Uparenggan paumahan minakadi meja, kursi, lemari, lan sapanunggilanipun
- Pepayonan utawi tanem tuwuh.

Ca Kelihan miteketin mangda barang-barang sane karampag kacihnain antuk sawen gumentos polih panumbas rampagan samael-maelnyane.

Ra Pikolih adolan rerampagan nalih katulakang prade langkung ring utang sang karampag.

Ka Sang karampag tan dados ngalengin pamargin parampagan saha tan maren sareng nyaksinin parampagan

(3) Prade jadma karampag tan manut tur tan wenten usaha pacang naur lan sapratingkah mamelek seosan, ri sampun kakertain antuk pamucuk desa sane maangga kerta desa mawastu jadma inucap rnuwak pasubaya sejeroning awig-awig matemahan kawenan krama desa ngamengin utawi tan ngalugrain suaran kulkul ketah kabaos kasepekang.

(4) Sang kasepekang kengin kawaliang makrama desa/banjar ri sampun:

Ha Nunas geng pangampura utawi nyuaka ring krama desa/banjar riantukan nguak/tiwal ring pasubaya sane kararemin pecak.

Na Naur pangargan tan nganutin awig-awig sane macihna arthabrana duk pacang kasepekang/kararyanang.

**SARGA KUTUS**  
**NGUWAH-NGUWUHING AWIG-AWIG**

**Paos 86**

- (1) Nguwah-wuhin awig-awig puniki kadasarin antuk pararem desa, kamargiang olih pamucuk desa adat Sobangan.
- (2) Pangapti uwah-uwuh inucap mangda kadasarin antuk pakarsan krama desa.
- (3) Pamutus bawos kadasarin antuk gilik saguluk utawi pararem.

**Paos 87**

Peparuman indik nguwah-uwuhin awig-awig kadi ring ajeng kengin kamedalin antuk Kelihan Banjar, Kelihan Desa, niri-niri miwah sinarengan.

**SARGA SANGA**  
**P A M U P U T**

**Paos 88**

- (1) Awig-awig puniki kawastanin awig-awig desa adat Sobangan.
- (2) Awig-awig puniki kamargiang ngawit kararemang.

**Paos 89**

- (1) Sakaluring sane wenten saderengnia, patut kaanutang ring sadaging awig-awig puniki.

- (2) Sakaluring sane durung kabaos sajeroning awig-awig puniki patut kaanutang tur kamargiang manut tata cara sane sampun ketah mamargi kadulurin antuk pararem-pararem.

**Paos 90**

- (1) Awig-awig puniki kararemin duk rahina Saniscara Pon wuku Sinta pinanggal 15 sasih kasanga Isaka warsa 1935, tanggal 15 Maret 2014. ring pura Desa/Bale Agung Desa Adat Sobangan.
- (2) Awig-awig puniki kalingatanganin antuk Kelihan Desa Adat kasarengin antuk Kelihan Banjar Adat saha kasaksinin antuk Kelihan Dinas sawewidangan Desa Adat Sobangan.

**Prajuru Desa Adat Sobangan :**

Klihan Desa Adat Sobangan,

I Kadek Oka Suarya., S.St

- (2) Klihan Adat Br. Selat,  
I Ketut Diyut. (.....)
- (3) Klihan Adat Br. Tengah,  
I Wayan Kawit. (.....)
- (1) Klihan Adat Br. Tegalnarungan,  
I Wayan Sujana., S.Pd. (.....)

**Prajuru Dinas maka saksi:**

- (1) Kelihan Dines Banjar Selat  
I Made Suartayasa. (.....)
  
- (2) Kelihan Dines Banjar Tengah  
I Nyoman Riksawan. (.....)
  
- (3) Kelihan Dines Banjar Tegalnarungan  
I Wayan Santika (.....)

**Perbekel Sobangan ;**

I Ketut Mas Budiarta., S.H.

**Camat Mengwi ;**

**I Gusti Ngurah Gede Jaya Saputra., S.Sos., M.Ap.  
NIP 19750207 1993 11 1 002**

**Majelis Madya Kabupaten Badung**

**Ida Bagus Gede Puja**

**Bupati Badung,**

**ANAK AGUNG GDE AGUNG**

## **SARGAH SANGA**

### **SAMAPTA**

#### **Pawos 88**

- (1) Awig-awig puniki kawastanin Awi-awig “ **DESA ADAT SOBANGAN**”
- (2) Awig-awig puniki kamargiang tur kasungkemin ring paruman Desa;

#### **Pawos 89**

- (1) Sakaluwir sane wenten sadurungnya patut kaanutang ring sadaging Awig-awig puniki;
- (2) Sakaluring sane durung kabawos sajeroning Awig-awig puniki patut kamargi ang manut tata cara sane sampun katah mamargi kadulurin antuk pararem;

#### **Pawos 90**

- (2) Awig-awig puniki kamargiang tur kasungkemin ring paruman duk rahina:  
Saniscara wuku Sinta, pinanggal ping: 15 Sasih Kasanga, Isaka warsa 1935

Tanggal Masehi 15 Maret 2014 magenah ring Bale Paruman Desa Adat Sobangan;

- (3) Risampun kasahang Awig – Awig puniki, awig – awig warsa 1987 Masehi nenten malih kemanggehang;
- (4) Awig-awig puniki kelinggatanganin olih Kelian Desa utawi Bendesa Adat, kesarengin Kelian-kelian Banjar Adat lan kasaksiang antuk Kepala Lingkungan miwah Lurah Sobangan, Camat Mengwi, Saha Kapikukuh antuk Bupati Badung

### **BANTANG AWIG-AWIG DESA ADAT SOBANGAN**

MURDHA WAKYA .....	Pra 1
MURDHA CITTA.....	Pra 2
BANTANG AWIG-AWIG DESA ADAT LUKLU	1
SARGAH PERTAMA ARAN LAN WEWIDANGAN DESA	2
SARGAH KALIH PAMIKUKUH LAN PETITIS	2

#### SARGAH TIGA SUKERTA TATA PAKRAMAN

Palet 1. Indik Krama	Palet 2. Pamucuk Desa	3
Palet 2. Pemucuk Desa		8
Palet 3. Indik Kulkul		13
Palet 4. Indik Paruman		14
Palet 5. Indik Druwen Desa		16
Palet 6. Panyanggran Banjar		17

#### SARGAH EMPAT SUKERTA TATA AGAMA

Palet 1. Indik Dewa Yadnya	17
Palet 2. Indik Rsi Yadnya	21
Palet 3. Indik Pitra Yadnya	21
Palet 4. Indik Manusa Yadnya	25
Palet 5. Indik Bhuta Yadnya	25

#### SARGAH LIMA SUKERTA PAWONGAN

Palet 1. Indik Pawiwahan	27
Palet 2. Indik Nyapihan lan Walu	31
Palet 3. Indik Sentana	33
Palet 4. Indik Warisan	34

#### SARGAH NEM SUKERTA TATA PALEMAHAN

Palet 1. Indik Sukerta lan Pamitegep	36
Palet 2. Indik Karang, Tegal lan Carik	38
Palet 3. Indik Pepayun	38
Palet 4. Indik Wewalungan	39

Palet 5. Indik Wewangunan	39
SARGAH PITU WICARA LAN PAMIDANDA	
Palet 1. Indik Wicara	40
Palet 2. Indik Pamidanda	40
SARGAH KUTUS NGUWAH-NGUWUHIN AWIG-AWIG	
SARGAH SANGA SAMAPTA	
Gambar wawidangan jagat Bali.	42
Gambar wawidangan lan kakuwub Desa Adat Sobangan.	

## MURDDHA WAKYA

OM SWASTYASTU,

---

*Awig-awig Desa Adat Sobangan.*

Saking kasidian ping kalih paswecan Ida Sang Hyang Widhi Wasa, cakepan puniki prasida kacarik saha kapuputang tur kasinuratang sane kaanggen titi pangancan, uger-uger utawi sepat siku-siku ngelaksanayang tata krama nyanggra Desa Adat lan Agama Hindu ring jagat Sobangan mangda prasida sidaning don mukti karahayuane sekala lan niskala utawi moksa wahya adyatmika, suka tan pawali duka.

Rikala ngreka saha ngiket cakepan Awig-awig puniki makeh pakeweh sane kapangguh duaning tuna kauningane sahantukan tityang dahat wimuda, janten wenten munjuk lungsur antuk tityang midartayang. Sewosan ring punika pakewehe indik basa paribasa, anggah ungguhin basa, sor singgih madyaning basa sane patut kaanggen ring lengkara-lengkarane mangda manut sakadi tatujon Awig-awig saha sang anampenin daging nyane, nenten nganutin pasulur.

Ring Sajeroning Panyuratan Awig-awig punika kapidartayang indik kawentenan Parahyangan, Pawongan lan Palemahan ring sajeroning kawentenan Tri Hita Karana.

Mantuke ring paraangga muwang ring sang sane meraga sujana miwah sane tiyosan sane sampun ledang ngiceni panuntun utawi piteket-piteket ring sajeroning ngaripta Panyuratan Awig-Awig puniki tityang ngaturang suksmaning manah. Pinaka Wasananing atur tityang mewali ngaturang suksmaning manah, dumugi ngamolihang karahajengan sekala niskala malarapan antuk ngajegang adat lan agama Hindune ring Desa Adat Sobangan.

Om Shantih, Shantih, Shantih Om

MURDDHA CITTA

OM AWIGHNAM ASTU, DESA TATA CARA, OM NAMA CIWAYA

OM CRI PASUPATASTRA, OM AWIGHNAM ASTU NAMA SWAHA

Mangkana panamaskara mami kabeh ri Sang Hyang Parama Wisesa siddha amanggih dirghayusa tan kataman lara wighna pinakang hulun kabeh krama Desa Adat Sobangan. Putusing panugrahan i krama Desa Adat Sobangan, gumawe awig-awig Desa Adat, Desa tata cara, wastu kasiddan prayojana mami kabeh kateka tekeng dlaha prasama pada sumangkem mwan amanggehaken kadi linging awig-awig.

Sembah bhakti miwah pangastawan krama majeng ring paduka Bhatara – Bhatari sasuwunan sami, riantukan wantah malarapan panghyangning kalih paswecan Ida Sang Hyang Widhi Wasa asung kretawaranugraha manresti jagat jangkep rawuhin sadagingnya sami, mawinan wenten kahuripan sekala niskala ring Bhuwana Agung miwah Bhuwana Alit.

Manut dresta, Desane kamanggehang dados pasayuban Krama Desa rawuhing Kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Desane taler kamanggehang pinaka pawakan bhawa mahurip, sane kacirenin antuk wentene pakilit Tri Hita Karana sane tan dados pasahang luwire :

Ha. Parhyangan inggih punika : Sahanan parhyangan panyiwian Desa, genah ngarcana prabhawan Ida Sang Hyang Parama Wisesa, pinaka jiwa pramanan Desane ;

Na. Pawongan, inggih punika : Gebogan Krama rawuhing warga Desa maka sami pawakan Tri Kaya pinaka bayu pramanan Desane, mawinan Desane prasida molah maprewerti ;

Ca. Palemahan, inggih punika : Sahananing pakarangan, tegal, carik, miwah setra sakakuwuban Desa Adat, pinaka sthula sariran Desane.

Awig-awig puniki ngawit puput kapirarem nemoning rahina .....  
pinanggal/ping..... sasih ..... icaka, warsa..... tanggal  
.....bulan..... warsa..... masehi.....  
ring..... lan Kaparipurnayang nemoning rahina .....  
wuku..... tanggal..... bulan..... warsa .....